

UDAKO EUSKAL UNIBERTSITATEA. Miarritzeko ikastaldiak uztailaren 2tik 6ra iraganen dira

Mugaz gaindiko loturen garatzeko tresna juridikoak aztertuko dituzte

Euskal Herriko klimatologiari buruzko ikastaldi bat antolatuko dute aurten, lehen aldikotz

Eneko Bidegain | **MIARRITZE**

Udako Euskal Unibertsitatearen Miarritzeko ikastaldietan, Zuzenbide Sailak mugaz gaineko harremanak aztertuko ditu, uztailaren 4tik 6ra bitartean, ostalaritza lizeoan (UEU bi egun lehenago hasiko da). Baionako itunak harreman horien garatzeko eskaintzen dituen tresna juridikoak aztertuko dituztela jakinarazi zuen atzoko aurkezpenean Garikoitz Lekuonak, Zuzenbide Saileko arduradunak. Baiona-Donostia eurohiria anitz aipatuko dute, horren «eragin fisikoa Ipar Euskal Herrian nabaritu delako». Ikastaldiaren antolatzaileei ez zaie «eurohiria abstraktuki interesatzen, baizik eta zein diren tresna juridikoak horrelako proiektu bat aurrera eramateko».

Felipe Saragueta Bidasoa-Txingudi Partzuergoko ardura-duna eta Ander Arzeluz eurohiriaren proiektuaren idazkaritza teknikoko kidea mintzatuko dira Baionako Itunaz. Xabi Laralde ekonomista eta Abertzaleen Batasuneko zinegotziak Hego eta Ipar Euskal Herriko errealitate sozioekonomiko eta politikoa aurkeztuko du. Alderdi politikoen ordezkariak Baionako Itunaz eta eurohiritik eztabaidatuko dute, «harreman instituzionalerako ate gisa».

Aurtengo ikastaldietako bigarren berrikuntza klimatologia eta meteorologia saila da, Xabier Isasi UEUko zuzendariak jakinarazi zuenez. Euskal Herriko klimatologia ikertuko dute, hainbat ikuspegiaren bitartez: hegaztien migrazioa, herri ja-kinduria, uraren kudeaketa, ozonoa eta abar. Pello Zabala eta Jon Albusuk hartuko dute ikastaldiaren ardura.

Natur Zientzietako Sailean elikagaien kalitatea ikertuko dute, betiere gaur egungo hurbileko gaiei interesatzeko helburuari loturik.

Ekitaldi osagarriak

Aurten ere, arratsero ekitaldiak iraganen dira, ikastaldiez gain. Urbeltzen ganbareekin dantza ikasi ahal izanen da. Ur Apalategi, Harkaitz Cano eta Joseba Gabilondok *Euskal literatura made in USA* ikusgarria eskainiko dute. Amets Arzallus, Sustrai Colina, Xabier Silveira eta Estitxu Arozenaren bertso saioa entzuten ahalko da. Iñigo Aranba-

rri, Jose Luis Otamendi, Ubeda anaiak eta Karlos Arantzegiren *Ibiltarixanak* lana emanen dute. Peio Etxeberri-Aintxart *Euskal Rock & Roll* liburuaz mintzatuko da.

UEUren Ipar Euskal Herriko egiturak urte osora zabaldu nahi ditu ekitaldiak. Aurten jandak zenbait hitzaldi antolatu

ditu Eihartzea Hazparneko kultura zentroarekin. Maitena Carment UEUko Baionako langileak ekitaldi gehiagoren berri eman zuen. Uztailaren 13rako eta 27rako mintzaldiak antolatuko dituzte Izuran, Oteizari buruz. Haize Berri kultura etxeak Oteizaren obrekilako erakusketak antolatu du uda osorako.

Hitzaldi sail horren helburua «Ipar Euskal Herriko jendearen jakin-mina sortzea eta UEUren bitartekoen bidez jakin-min horren asetzeta» da. Duela bi hilabete hitzaldi bat antolatu zuten Hazparnen Euskal Autonomia Erkidegoaz. Berrogei bat jende bildu ziren, eta hori baikortzat jotzen du UEUk.



BOB EDMELaz Miarritzen egin ziren ikastaroetako bat.

IKASTALDIK

Gustu guztietarako

Bederatzi ikastaldiren hautua izanen dute UEUa biltzen direnek, artean, giza zientzietan eta natur zientzietan.

MUSIKA. Euskal jolasen inguruko ikastaldian, «euskararen berreskuratzeko prozesuan jolasak izan dezakeen garrantzia» hausnartuko dute. Hurrek erdaraz jostatzeko duten joera aztertuko dute eta aterabideak bilatuko.

ITZULPENGINTZA ETA LITERATURA. «Euskal literatura munduratzeko eta mundukoa gerturatzeko itzulpen lantegia» osatuko dute.

KAZETARITZA. *Euskal komunikabideak XXI. mendearen atarian* gaiarekin, gero eta gehiago hedatzen ari diren teknologiek Euskal Herriko hedabideetan zer eragin izan dezakeen aztertuko dute.

PSIKOLOGIA. Programazio neurolinguistiko eta sinismenak aztertuko dituzte.

SEXUALITATEA. Gorputz galduaren bila ibiliko dira. Bakoitzak bere «irudia berreskuratu eta horretarako bere gorputzaren ezagupen positiboa» izan beharraz jabetzea da helburua.

SOZIOLOGIA ETA ZIENTZIA POLITIKAK. Globalizazioaren paradoxa landuko dute, hots mundializazioaren hazkunde, alde batetik, eta identitateen berpiztea, bertetik.

ZUZENBIDEA. Baionako Itunaren eta eurohiriaren bitartez, Ipar eta Hego Euskal Herriaren arteko harreman instituzionalak mintzatuko dira.

KLIMATOLOGIA ETA METEOROLOGIA. Euskal herriko klimatologiari buruzko ikastaldia.

NATUR ZIENTZIAK. Elikagaiak geroz eta zainduagoak edo geroz eta pozoiuagoak? galderari erantzuten ahaleginduko dira.

EUSKARA

Helegiteak aztertzen eman ditu lehen hilabeteak Euskara Kultur Elkargoak

Erredakzioa | **IRUÑEA**

Nafarroako Gobernuaren eta Iruñeko Udalaren aurka ezarritako helegiteak eta kexak izan dira Euskara Kultur Elkargoaren azken hilabeteotako lana. Euskara Kultur Elkargoan *artekaria* sortu zuten euskal hiztunek nonahi eta noiznahi euskaraz mintzatzeko eta adierazteko eskubidea zutela sustatzeko.

Alta, Jose Luis Mendoza aipatu fundazioa lehen-dakariak adierazi duenez, egun Nafarroan euskarak duen «errealitateak» beste bide batzuetan lanean ari zera bultzatu ditu.

Ildo horretan, Foru Erkidegoko Administrazioan euskara erabiltzeko dekretuari helegitea aurkeztu dio. Iruñeko Udalaren jarrrerari dagokionez, Elkargoan hainbat kexa eta kontsulta egin dira. Alde horretatik, salatu dute Udalak gero eta gutxiago erabiltzen duela euskara zerbitzuak emateko tenorean.

HEZKUNTZA

Bergarako UNEDek euskara, galegoa, ingelesa eta frantsesa eskainiko ditu

Ainara Argoitia | **DONOSTIA**

Espainiako Urrutiko Hezkuntzarako Unibertsitate Nazionalaren (UNED) Bergarako ikastetxean euskara, galego, ingeles eta frantses ikasketak eskainiko dituzte urritik aurrera. Berrikuntza esanguratsuena hori da, baina bada besterik ere: hiru lizentziatura eta diplomatura berri bat izango dira aukeran.

Gipuzkoan dauden beste unibertsitateen osagarri izan nahi du Bergarako UNEDek; eskola orduetara joan ezin diren ikasleei eta orain artean ikasterik izan ez dutenei karrera bat ikasteko aukera eskaintzea du helburu, Juango Alvarez zuzendariaren hitzetan. Horretarako, urrutiko hezkuntza metodologia eta ohiko eskola orduak uztartzen dituzte bertan.